

# Rapport dalla seduta dil cussegl da vischnaunca dils 19 da november 2019 a Vuorz

## Beinvegni ed avertura

Il president dil cussegl, Luzi Pfister fa a tuts presents in cordial beinvegni alla seduta da questa sera.

La gliesta da tractandas, la quala ei vegnida tarmessa tier cun l'invitaziun, vegn suttamessa alla discussiun. Damai ch'ei vegn buca fatg diever da tala ei la gliesta per la seduta da questa sera ligionta.

Cunquei che omisdus dumbravuschs han perstgisau per questa sera, sto vegnir elegiu in dumbravuschs. Luzi Pfister fa la proposta sin Sven Seeli. Autras propostas dat ei buc ed aschia vegn Sven Seeli elegius unanim sco dumbravuschs.

## 1. Approbaziun dil protocol dalla seduta dil cussegl dils 11 da zercladur 2019

Il protocol ei vegnius tarmess allas cusseglieras ed a tuts cussegliers. Il president dil cussegl suttametta el alla discussiun. Da tala vegn buca fatg diever. Il protocol vegn approbaus unanim.

## 2. Approbaziun: lescha da polizia

La lescha da polizia cuntegn determinaziuns per il territori communal che completeschan la legislaziun federala e cantunala :

- a) per mantener la segirtad publica ed igl uorden public ;
- b) per garantir la segirtad da persunas ed animals
- c) per proteger igl ambient e la proprietad da donns e prighels da tut gener

Cheu settracta ei dad ina nova lescha, la quala existeva buca en las anteriuras vischnauncas.

Clau presenta al cussegl la lescha e repassa ils differents artechels. La suprastonza propona al cussegl d'approbar quella lescha e da metter quella naven digl 1 da schaner 2020 en vigur.

La discussiun vegn dada libra. Sin las damondas sa vegnir dau risposta. Sulettamein tier art. 12 al. 1 vegn giavischau che la suprastonza sclareschi aunc ina gada schei seigi correct, da scumandar denter ils 15 da mars ed ils 15 da november da passar tras funs jester. Ulteriurs givischas per midadas dat ein negins. Cun tscharna unanima approbescha il cussegl la lescha da polizia, priu ora igl art. 12 al. 1 che vegn aunc scarliu giu en detagl. Cu quei art. ei sclarius, vegn il cussegl informaus giudlunder.

## 3. Preventiv e quen d'investiziun 2020

Il preventiv ei vegnius tarmess tier a tuts cussegliers per informaziun. Tal siara suenter expensas da frs. 12'786'650 ed entradas da frs. 13'240'517 cun in surpli entradas ell'altezia da frs. 453'867. Quei ei il tierz preventiv che ei vegnius fatgs suenter il niev model da quen MAC2, ed aschia ha quel saviu vegnir fatgs per gronda part tenor las cefras dil quen 2018. Il quen d'investiziun preveda expensas da frs. 3'990'000 ed entradas da frs. 955'000. Las investiziuns netto muntan per consequenza a frs. 3'035'000.

Il president communal repassa il preventiv dil quen current sco era dil quen d'investiziun e dat sclariments tier tut ils puncts principals. Sin las damondas tschentadas sa vegnir

rispundi. Il cussegl approbescha entras tscharna unanima il preventiv cun quen d'investiziun 2020 per mauns dalla radunonza communal. Cun quella approbaziun ein era ils credits necessaris tenor il quen d'investiziun concedi.

#### 4. Pei da taglia 2020

Mintg'onn han il cussegl da vischnaunca e la radunonza communal la pusseivladad da fixar il pei da taglia. Cun la fusiun ei il pei da taglia dalla vischnaunca da Breil vegnius fixaus sin 100% dalla taglia cantunala. La suprastonza fa la proposta da restar sco tochen dacheu sin 100%. Ils proxims onns spetga tenor il plan da finanzas in grond buordi d'investiziuns sin la vischnaunca, aschia ch'ei fuss buca prudent da reducir il pei da taglia.

La taglia sin schischom sto tenor lescha da taglia vegnir fixada mintg'onn da niev. Quella taglia importa denter 1.5 entochen 2.0 promils. La suprastonza communal fa la proposta da restar sco tochen dacheu sin 1.7 promils.

Las damondas vegnan suttamessas alla discussiun. Da tala vegn buca fatg diever. Cun tscharna unanima decida il cussegl per mauns dalla radunonza communal da fixar il pei da taglia ordinari sin 100 % dalla taglia cantunala semplia ed il pei da taglia sin schischom sin 1.7 promils.

#### 5. Elecziun dalla suprastonza dil cussegl per la proxima perioda d'uffeci

Tenor constituiun sto la suprastonza dil cussegl vegnir elegida mintga onn.

##### a) president dil cussegl

Luzi Pfister ei staus onn en uffeci sco president dil cussegl. Sco successiva fa il vischinadi da Danis la proposta sin la vice-presidenta Prisca Sgier. Ulteriuras propostas dat ei buc.

Cun tscharna unanima elegia il cussegl Prisca Sgier sco nova presidenta dil cussegl da vischnaunca per la proxima perioda d'uffeci dad in onn.

##### b) vice-president dil cussegl

Cunquei che Prisca Sgier ei vegnida elegida sco presidenta dil cussegl sto vegnir elegiu in niev vice-president ni ina vice-presidenta. Il vischinadi d'Andiast fa la proposta sin Tarcisi Dietrich. Ulteriuras propostas dat ei neginas.

Cun tscharna unanima elegia il cussegl Tarcisi Dietrich sco niev vice-president dil cussegl da vischnaunca per la proxima perioda d'uffeci dad in onn.

##### c) actuar dil cussegl

La suprastonza communal fa la proposta sin il canzlist Curdin Cadonau. Ulteriuras propostas dat ei neginas.

Cun tscharna unanima elegia il cussegl Curdin Cadonau sco actuar dil cussegl per la proxima perioda d'uffeci dad in onn.

#### 6. V a r i a

Luzi Pfister resumescha cuort siu engaschi sco president dil cussegl. El fa menziun dalla lavur prestada el davos onn ed engrazia alla suprastonza per la buna lavur da preparaziun dallas fatschentas. Vinavon engrazia el als cussegliers per la presenza e la partizipaziun: Alla nova presidenta Prisca Sgier ed al vice-president Tarcisi Dietrich giavischa el tut mo il bien cun surdar in pign present. El giavischa allas cusseglieras ed als cussegliers in bien retourn a casa e siara la seduta dallas 21:50 uras.

Breil, ils 20 da november 2019

**Il president**

*Luzi Pfister*

**Igl actuar**

*Curdin Cadonau*